

respectifs. C'est pourquoi nous ne l'insérons ici que pour l'usage des prêtres des trois Districts de Québec, des Trois-Rivières et de Gaspé. La voici.

“ ILLUSTRISIME AC REVERENDISIME DOMINE.

“ Quod Dominus Noster JESUS CHRISTUS jam præmonuerat, para-
 “ bolâ usus Agricolæ, qui *seminavit bonum semen in agro suo; cum autem*
 “ *dormirent homines, venit inimicus ejus, et superseminavit zizania in medio*
 “ *tritici. (Matth. 13. 24);* Id quidam nostris hisce temporibus in Hiberniâ
 “ præsertim accidere, non sine maximo rei catholicæ detrimento videtur.
 “ Pervenit enim ad aures S. Congregationis scholas Biblicæ Societatis in totâ
 “ ferè Hiberniâ esse institutas, Acatholicorum Procerum opibus ac patrocinio
 “ suffultas, in quibus fuco charitatis rudes utriusque sexûs adolescentes, præ-
 “ cipuè vero ruricolæ atque egeni, blanditiis atque etiam munusculis præcepto-
 “ rum illecti, mortifero pravarum doctrinarum veneno inficiuntur. Additur, hu-
 “ jusmodi scholarum magistros esse Methodistas, qui bibliâ utuntur à Biblicâ So-
 “ cietate Anglicè redditâ, erroribusque refertâ, alio nullo sibi proposito fine,
 “ nisi seducendi juvenes, et orthodoxæ fidei veritates ex eorum animis penitus
 “ evellendi. Hæc cum ita sint, Amplitudo Tua jam videt quantâ sollicitudine
 “ et studio Pastoribus vigilandum est, ut gregem suum à luporum insidiis, qui
 “ veniunt in vestimentis ovium, sedulò tueantur. Si Pastores obdormiunt, citò
 “ subrepet inimicus homo, loliunque seret, citò zizania videbitur in medio tritici
 “ succrescere, illudque operire. Quare necesse est omnem navare operam, ut
 “ adolescentes à lethalibus hisce scholis avocentur, ac monere parentes ut libe-
 “ ros suos in errorem duci minimè patiantur. Ad vitandas autem adversariorum
 “ insidias nihil aptius esse videtur, quam catholicas erigere scholas, in quibus
 “ pauperes ac rustici bonis disciplinis instituuntur. Deerit fortasse modus sup-
 “ plendi sumptibus? Addisci hic facile poterit ab ipsis heterodoxis, qui, ut
 “ accepimus, pro earumdem scholarum sustentatione hebdomadalem unius assis
 “ stipem à singulis de populo rogant. Quid vetat, ne et idem Catholici faciant?
 “ Hortamur igitur, ac per viscera Domini Nostri JESU CHRISTI obsecramus
 “ Amplitudinem Tuam, ut eo meliore, quem arbitraris, modo gregem tuum
 “ diligenter custodias ab iis, qui insidiosè se immittunt in ovile Christi, ut in-
 “ cautas oves abducant; ac memor eorum, quæ Petrus Apostolus jam prænun-
 “ tiavit tradens, quod *et in vobis erunt magistri mendaces, qui introducent sec-*
 “ *tas perditionis, (2. Petr. 21.);* omni curâ des operam ne orthodoxa juvenus
 “ ab iis corrumpatur, quod quidem faciliè te assequuturum spero, si catholicæ
 “ scholæ in tuâ Diœcesi erigantur. Ac dum fore confido ut Amplitudo Tua
 “ in re tanti momenti omnes animi vires adjiciat, ne scilicet bonum triticum
 “ zizaniâ suffocetur, Deum O. M. precor, ut eandem diutissime servet ac sos-
 “ pitet.

Amplitudinis Tuæ

ad officia paratissimus

✠ JULIUS Mar. Card. de Somalia Pro-Præfectus.

Romæ, ex ædibus S. Congregationis de
 Propagandâ Fide, die 5 Augusti 1820.